

晚晴移詩匯

晚晴詩匯卷一百一目錄

吳敬 二首

祖之望 十首

邵自昌 一首

恭泰 二首

錢世錫 十首

張九鐔 七首

何西泰 二首

馮培 三首

管世銘 十首

李鼎元 十六首

馮敏昌 十六首

陳詩 二首

周嘉猷 二首

長闢 四首

沈長春 三首

周鏞 一首

何夢蓮 二首

紀大奎 四首

趙希璜 五首

李大成 三首

何文明 三首

黃錯 二首

張懷泗十一首

胡翹霜二首

王心清一首

晚晴移詩匯卷一百一

徐世昌

吳璫字式如號菘圃錢塘人乾隆戊戌進士改庶吉士  
授編修官至吏部尙書協辦大學士有楞香齋詩存  
贈孟巖樞部兼懷耕亭前輩卽次孟巖寄懷舫西原  
韻

鷓行憶昔侍龍墀忽漫相逢入洛時紙價定因才子貴頭  
銜休恨省郎遲樊籠詎託摩雲翮杼軸都成織錦絲莫道  
囊空羞澀甚奚童檢點汴游詩

萍蹤離合只尋常握手相看總異鄉南國梅開江繞雪大  
河風急雁唳霜話逢舊雨頻燒燭譜出新詞試引商好待  
蓬山旋絳旆金尊仍約醉糟牀

祖之望字載璜號子久浦城人乾隆戊戌進士改庶吉

士官至刑部尙書有皆山草堂詩鈔

詩話載璜詩專任性靈不事雕琢雖學香山未至而時聞天籟令人移情

過排山驛

路通五管勢難平人在松杉頂上行日影倒翻飛鳥背天  
風直挾大江聲眼前野水多於地到處青山半似城聞道  
嶺南林壑美蠻煙瘴雨不須驚

入粵西全州界

楚尾同分野湘源昔未經雲根連水白山面向人青乳竇  
穿巖腹松陰護草亭讀書行萬里小轎關疏櫺

將至岳陽

出都近三旬始達熊湘境大雲七十峯一一紛造請似知

我舊游相識先引領肩輿躡其巔空闊無留影天釀雪氣  
寒雲蒸石骨冷人煙隔溪水綠浸松杉靜輕篔弄風柔宿  
鳥投林猛待上夕波亭湖山色已暝

抵黃州

百八江程一日馳蒲帆葉葉渚風吹三年再作黃州客千  
里來參玉版師西塞魚肥新漲落東坡草長舊磯移中流  
疊鼓鳴笳處赤壁城頭日暮時

赤壁磯放歌

昔我黃州回赤壁翻空天倒開今我黃州來石磯水落山  
崔嵬津亭船多難徑渡江風留客江邊住齊安太守爲開  
樽一杯滿泛郢川樹三巴五湖几案間看盡江南江北山  
度曲飛觴紅日暮使我對此開心顏雪堂舊是東坡宅獻

酬不辨誰主客野梅十枝五枝花修竹千竿萬竿碧更假  
雙屐登虬龍醉影戲侮馮夷宮恍惚身輕生羽翼夜半飄  
舉來江東當年從游二三子古生潘郭依稀是不知何人  
吹洞簫毋乃西州楊道士買田築室亦偶然巉巖千載鐫  
姓氏後來好事流以訛強名赤嶼山靈訶祇今州南四百  
三十步但見白浪堆青螺噫嘻熙豐之世多秕政王章變  
法專朝柄慷慨獨上萬言書當宁流涕時相病鍾山落窳  
雷州窮先生畢竟人中龍儒林仙佛莫能名餘事猶足當  
文雄如此江山信可樂不有賢豪終索寞檣帆簫鼓接雲  
煙空訪游踪墮寥廓峨眉蒼岷水長先生高風不可望

蓬心太守乞休構心太平菴於鄂渚貽以洗桐之資  
兼詩爲謝依韻奉酬蓬心爲麓臺先生姪孫太常

煙客之後也能詩畫善飲年七十餘強健如少年  
知君避跡在牆東自縛茅齋自洗桐老興尙能浮太白新  
詩未許號三紅縱饒杞菊無餘俸賴有煙雲養此翁惆悵  
松陵鄉路近樂郊門地晚增榮蓬心爲余言將賣心太平  
菴料理歸計余戲謂蓬心  
心太平矣何有於菴果  
賣卻乃更一絲不掛

觀音巖

在京山

入門未見泉泠泠已盈耳洗耳兼洗心浩若無盡水以彼  
活潑機悟茲靜深理石闌護壇高藤蘿俯澗底樹根託虛  
無壁立憂傾圮天喬互撐拄綠映鬚眉喜六月森陰寒萬  
籟增清美一杯禱山靈住山從此始何處無林泉不歸吾  
老矣

游靈隱寺遂躡韜光徑小憩金蓮池上



侵晨陟巖扃莽莽深霧互冥踏身漸高薄曦辨樵徑登頓  
不知遙盤折非一磴邱壑墮渺茫林木紛艷葩繁若雨露  
滋餘泣珠光凝到寺倏晶明入門發高與何處峯飛來儼  
從地底迸嵌空構虛無剗刻孰梯墜洞府羅精靈縱橫皮  
几甃下墜憂敲傾上措慮蹒跚根留太古雲胎出鴻蒙孕  
石髓膠不流寒漿繞其脛遂令靜者心悠然愜清聽相與  
游精藍禪悅方出定稱詩略上口事佛信匪佞出示香光  
書雲棲可互證雲棲有董思翁書金剛經爲鎮山墨寶沿緣得幽蹊決計還  
攬勝野竹凌青霄紅葉綴丹磴曲篔簹細通流修坂履移澄  
足急漫重繭腰折迺類磬堪笑血肉軀嘔噦吐餽釘濯以  
清冷泉坐來冰雪瑩捫蘿讀薛碑觀魚對水鏡一杯候火  
茶兩腋清風淨愧分伊蒲供曾無怪石贈趣永澹忘歸登

舟日將暝揚帆別山靈後約庶可訂

穀溪灘行

吾州建溪灘怒石立巨浪浙溪雜砂磧小波微激蕩扁郎  
太章皇操觚不敢唱男婦紛叫囂慄如赴敵狀來船誤當  
衝去船急扼吭水石聲相仇陸行須冪邊當其偏仄時篙  
師怒相向得失尺寸間誰復知禮讓我願挽頽波萬斛得  
通暢來去任自然樵風輕五兩

望海

行到東維山盡處一痕濃黛繞登萊數拳小島浮漚出萬  
古神淵疊浪催泰岱脈從遼海渡珍珠門向日南開蓬壺  
縱有仙人住漢武秦皇安在哉

邵自昌號楚帆大興人乾隆戊戌進士改庶吉士授編

修官至左都御史有世麟堂詩

道中卽景

振策春風道香塵拂短袍路分隄柳斷水淺石梁高村犢  
依新草山禽掠小桃迎人芳意足鞍背頓忘勞

恭泰原名公春字伯震號蘭巖滿洲旗人乾隆戊戌進  
士改庶吉士授檢討官至盛京兵部侍郎

宿建昌縣

昨夜秋風起涼生竹樹間鄉心黏短夢客路挂叢山身比  
猿猱健情隨鷗鷺閒亂蛩吟不住添我鬢絲斑

九日上寶珠洞絕頂

石磴盤旋上澄觀萬象殊入雲雙屐健破曉一筇孤眼界  
饒空闊林煙乍有無憑誰呼懶瓚爲寫晚秋圖

錢世錫字慈伯號百泉秀水人乾隆戊戌進士改庶吉

士授編修有鹿山老屋詩集

詩話百泉爲藟石侍郎子初入詞館侍郎與英文肅充教習文肅語百泉子入翰林而上卽命其父爲之師可謂至恩試考之古籍徵唐宋故事能多得不一時稱盛事詩瘦硬通神謹守家法其論視西欄詩謂幽靜娟秀深微雋妙能得古人神韻風味於語句之外蓋其得力所在見相似者而爲之傾倒也

枕上聽潮

窗虛月影微幽人夢未穩忽復驟松風響入空際遠初來  
何突怒漸乃嗚咽反試寫入冰絃絕勝聽笙阮鬼神巧節  
奏雄壯亦婉婉斯須歸寂然翕闢悟根本

自岢嵐往保德山行雜詩

盤盤山中路巧作螺紋旋將東反向西似帆隨湘轉上坡  
若挽船蹢躅疲驢戰下坡如放溜坦迤勢趁便壁立黃土

堆突兀已厭見不定嶺雲姿無名野花萼晉地何寥闊馬  
蹏踏將徧

看西澗作畫戲作長句

村優登春臺歌舞眩兒童兒童觀劇亦何樂但愛官人烏  
帽穿袍紅世人看畫亦論詩何異村童看劇短識知白描  
高手屏不愛惟愛十斛塗胭脂西澗作畫如作詩沈吟取  
格每逾時忽然有得快落筆雨葉風枝隨手爲勸君伸紙  
弗高格多畫牡丹多著色商彝周鼎棄溝渠吳門藥製宣  
爐百金直我今頽唐百不惜胡琴碎市亦何益望君畫貴  
多直錢分我澗筆沽酒喫

蕪齋先生用看畫韻作詩招飲疊韻奉答并東西澗  
催耕布穀村村同陌頭饑饉婦與童插秧望雨雨不足到

晚怕見林霞紅田家風景愛誦儲王詩杜陵深意人未知  
夏日夏夜發永歎視彼儲王秀句膩若脂蔭齋先生百無  
事講求詩律閑居時量晴課雨偶有作興到不煩繩削爲  
疏疏落落見風格洗盡脂粉留真色酒釀要本泉味甘弓  
良先辨木紋直朝來以詩代柬招我飲謂我有酒不飲良  
可惜守株刻劍愚被嗤鏤冰炊沙巧無益何如酩酊聽秧  
歌白楊梅熟儘堪喫

過補山編修廬舍小飲論文

古人絕學不易尋小技雕蟲曷足喜聰明無多好自炫立  
談早已見底裏鄉里小兒徵逐游衣冠楚楚蟬螭比杜門  
無人共讀書憐余偃偃瞽者似不殖將落難自樹老大無  
成伊何底知公韜晦含內心質有其文斯真美關中風氣

推獨厚導源須從子張子後來呂馬俱人豪強立不反基  
寸累布帛菽粟能活人何用珠玉及錦綺亦有潛德及草  
萊獨行君子二曲李貞松古柏凌煙霜不與花草隨風靡  
華而不實終何有羊質虎皮安足齒小飲醺然得暢談心  
花怒生粲珠蕊根柢不存喜弄筆恐與古人作奴婢

真定

昔日繁華地雄於燕趙間春風元石豕明月紫微山野曠  
蓬恆卷城荒柳自閑迢迢芳草色綠徧井陘關

山徑曉行

畏寒蒙絮帽車上宿醒醒詰屈穿山曲琳琅掣曉鈴霜侵  
牛背瘠樹暗虎風腥東望朝暉滿蛾眉一帶青

平湖書齋冬日偶題

千仞雲霄讓鳳翎  
兩三凍雀共空庭  
放歌天地紛哀落  
魄江湖任醉醒  
與我有恩窗日暝  
去人何遠海峯青  
琅然年少書聲好  
猶愛深宵與細聽

余於庚辰三月三日從金檜門先生渡滹沱河赴趙州  
今先生歸道山余以落拓浪游復過此河愴然  
有作

憶昨風光上巳天  
雙旌婀娜大隄邊  
髯仙控鶴今何處  
走馬寒煙一惘然

春日讀杜偶成

遲日江山物向榮  
杜陵老去未忘情  
桃紅竹翠郊扉晚  
苦說中年名賈生

張九鐔字竹南號蓉湖湘潭人乾隆戊戌進士改庶吉



士授編修有笙雅堂集

詩話蓉湖內行醇篤初以明經官郴州訓導繼乃舉於鄉官內閣中書及入詞林年已六十居京師二十年開戶著書病其時尙考據者輒不嫌於朱子多所辨證晚以子世浣令曲沃喜曰吾父昔官於此民爲立祠今吾子復官於此吾當往展謁乃就養焉

義帝祠歌

南公傷心武關客三戶人煙悲欲咽阿孫亦號楚懷王居巢老人定奇策牧羊立後原無功卿子冠軍非英雄渡河九戰鉅鹿震入關一炬咸陽紅將軍自王等閒耳徙帝上游嗟已矣誰令擊殺臨江中編素翻憐漢天子由來反掌成兒嬉君家世將甯如此鱉船下馬呼天亡咫尺江東非故鄉亡秦必楚楚事畢嶺雲郢樹同蒼涼君不見郴州城西一抔土碧血斑爛雪花舞寒銷白虎墓門空更聽明年

嘑杜宇

信陽大雪

關門一夜嘶嚴風，雞鳴霰集寒燈紅。平明徑問信陽道，風  
花颯沓雲溟濛。凌兢驢影凍欲死，雖有健步難爲工。客言  
河北艱難至，河冰十月聲琤琮。太行雪片大如席，飛狐倒  
馬誰能窮。勸君愛此瓊貝色，此行所歷將毋同。江淮咫尺  
動愁絕，輕煙點鬢如飛蓬。眼明竹樹尙歷落，手掇沙石皆  
玲瓏。汝南城郭在何處，回首不見關南東。憑陵荆楚壓淮  
蔡，青山一髮來天中。冥阨塞前聚虎穴，峭岬峯裏留蠶叢。  
當年封狼據平地，長戈快戟森刀弓。懸瓠池邊寂不備，坐  
令鵝鴨參軍容。英雄閒道頗制勝，要與夜雪成奇功。豪吟  
對此意飛動，舉杯一笑驚長空。

遣懷

慣作長安客深居學閉關微涼依道院殘夢別家山世味甯如此平生好自閑秋風飄忽起倦鳥未知還

六榕寺

題名看玉局無復六榕陰僧話茶煙久人行塔影深旃檀留法相梵唄起清音一宿宗門契何緣淨此心

清涼寺居感懷

六月清涼寺蕭然天地秋樹梢懸嶽影殿腳插湘流蟬急鴉聲靜鐘遲梵語幽靈山空掃地暫得一登樓

雨渡汾關卻寄太原音信

長夏陰涼曙色分山關南去傍橫汾津臨雀鼠常疑雨嶽近蛟龍半作雲京國衣冠猶繞夢天涯昆弟惜離羣息肩

早慰高堂望北顧音書幾日聞

晚秋廣陵泛舟

紅橋修禊冷春詩載酒江湖似牧之誰信一官煙月地歐

蘇鼎立見叢祠

時以阮亭合祀歐蘇爲三賢祠

何西泰字素華侯官人乾隆戊戌進士改庶吉士授編修有寶齋詩藁

積雨

積雨楚雲平連朝未肯晴井梧一葉落萬戶生秋聲衰草前村路空江獨夜情洞庭有歸思吹笛到天明

江行

風急正揚舲空江望渺冥羣山趨北固九派匯南溟別浦迢迢綠平蕪漠漠青臨流發長嘯身世一浮萍

馮培字仁富又字玉圃號實庵元和人乾隆戊戌進士  
改庶吉士歷官戶科給事中有鶴半巢詩存

晚次天津

霜清沙岸晚煙屯  
析木津邊氣吐吞  
星斗夜高天北戶  
蛟鼉秋壓海東門  
地通貢賦帆檣集  
家擅魚鹽井竈喧  
七十二沽稱沃衍  
由來左輔壯畿藩

題曾賓谷農部西溪漁隱圖

勝境西冷外蒹葭深復深  
叩舷墮山翠七十二峯陰  
未乞樵風便能諧漁父  
心肝江上客翻入越人吟

紅葉在秋袂白鷗知水扉  
以君寫招隱令我夢思歸  
泛宅惟茶具持竿有釣磯  
香溪結廬好同此揖清暉

香水溪在靈巖山下

余擬卜居於此而未逮也

管世銘字緘若號韞山武進人乾隆戊戌進士授戶部

主事歷官御史有韞山堂詩集

詩話韞山爲青村曾孫其爲制藝善言名理紆徐委  
備而辭必出於雅令場屋轉相倣倣成爲風氣亦究  
心於詩論次讀雪山房唐詩選四十卷宋人絕句四  
卷其所自作持論正大擇言雅馴不稍涉當時體世  
傳韞山慎時相專政將具疏論劾一夕遽卒今集中  
有觀臺一篇詩曰觀臺登望事非虛誰識天官太史  
書二曜互虧旬日近恆星散亂四更餘垂衣耄念勤  
兼奔問寢宸顏踉蹌舒朝列具瞻公府步心方泄泄  
視居居韞山子學洛附識謂詩成於嘉慶三年十一  
月初十日爲捐館之前二日生平志專於是長齋其  
後兩閱月睿皇親政時相  
卽被重譴借韞山不及待也

倉頡造字臺

萬古不長夜斯文煥初啟羲皇畫卦爻厥佐得倉史仰觀  
星斗象俯察躡迹理作字代結繩百度立綱紀功在堯文  
先宣尼稱後死遺臺如果在廟食應于祀胡令西來僧築

室踞其趾或云梵佞儂本出同父耳旁行及左行淵源無  
異揆斯言詎合經儒者未敢是小學今廢絕俗書方填委  
不知有籀斯安論蝌蚪起翻慚異域人各守開闢軌誰當  
執此咎已往無可訾又疑初造時鬼哭何不知先民亦有  
言識字憂患始

乘驛謠

昨歲使於越今歲使漢陽東南兩驛埃飛轡相追翔肥驛  
富盤餐瘠驛窘芻豆肥瘠雖不同情狀歸一轅軒車自北  
來偵騎卻先回頭銜甚赫奕牙爪何毡毳索增夫與馬應  
聲連者者供頓少或遲筮楚輒交下縣吏自門東罄折進  
紅封區區爲壽意願得資先容前驅聞此言始覺有顏色  
下逮圉與庖瑣屑各有得銀翅海鯨纜絲窩鳥燕銜數緡

羅一品犀筋不三拈賄成迺得饋車騎齊呼備看踏錦茵  
升私幸無咎恚亦有賢士夫守分不敢逾從人祇四五儉  
薄如寒儒心言此下客草草具杯炙授舍不掃除給馬惟  
骨酪漏鼓下三搥行人拂鞞鞞頻呼祇候隸相與醉倡家  
郵亭一老戍漫應還徐步問求緼火薪答言無買處使客  
意如何於吾則已多無言催就道王事敢蹉跎彼也賓豈  
知此也主誰白作歌陳兩端敬聽願凡百

題明皇幸蜀圖

中書已罷張九齡太守不識顏真卿黃虬跳梁蠱狐死倉  
皇蜀棧青螺行白衣父老前迎蹕羽騎林端出復沒宮人  
憔悴下雕鞍手摘園瓜供帝渴宣和中進入內更無羯鼓  
打梁州鈴語郎當聽未休劍門直上一千里風塵瀕洞天



顏愁後隊觀者忽如堵錦袍年少腰玉珮元禮力士非其  
傳疑是王孫英且武咄哉王孫儋耳龍奉天之辱將毋同

### 秦始皇冢

平生每讀秦本紀頗怪始皇脫三死一不死荆卿七把袖  
袖絕王得起再不死漸離筑實筑以鉛讐不復最後險絕  
博浪椎副車一擊聲如雷祖龍豈亦有天幸三十六年獲  
終令奈何甫葬驪山隈戍卒夜叫函關開詩書餘燼未銷  
歇反風遂使阿房灰乃知扶蘇未北輶轅返嬴祚不應若  
是短嗣王足蓋前人愆雖百趙高几上鸞殺秦一君乃有  
君子房幾作秦功臣豈如假手少子亥毋俾育種屠獭獍  
亡秦者胡又必楚始皇身存籍如許蒼壁直獻鎬池君誅  
謗之刑空偶語水銀江海黃金鳧朽骨安知殉鮑魚西來

重瞳怒一掘遂令萬代陵寢生艱虞歌莫哀君勿恐功德  
在人終不動樵採毋侵柳下壟陳涉何人但夥頤異代猶  
爲置守冢

漢通天臺金銅仙人歌

文成已誅樂大死武皇長生心未已黃金仙藥兩無成猶  
進銅盤一杯水茂陵一閉高臺空突兀仙掌摩蒼穹日精  
月華歷四百遂有靈氣通鴻濛赤眉含血不敢喋董卓焚  
燒亦未及牽車西來乃魏官欲輦銅人洛陽入青龍元年  
秋正半萬眾拆盤盤忽斷天傾地塌華山鳴數十里中雞  
大亂銅人既下觀者多汪然淚作流滂沱長安父老盡掩  
泣物尙戀主人如何萬牛之力終莫致倔強中途聞且置  
居然不辱魏宮前神鼎依稀沒清泗新故之間不可居夏

瑣秦璽恨何如華歆王朗盡名士及見銅人辭漢無

鸚鵡洲弔禰正平

奸雄龜鼎謀將作競致才人入私幕陳琳阮瑀何足多至  
今齒冷荀文若堂堂大漢一禰生才高氣烈操履貞孔融  
薦漢非薦賊要恃一鸚鵡清朝廷老瞞就使能容物我識禰  
生不爲屈漁陽摻搥蹀躞前慷慨聲情光日月此心視死  
甘如茹不擇曹瞞與黃祖殺身猶是建安年埋骨終須乾  
淨土睫論惟知弔尉羅文人但賞題鸚鵡芳草萋萋遠樹  
青一抔江漢共垂名何當配食三閭廟覽揆先教字正平

七夕夕直

行廬山色暝七夕夕郎歸引手明河近迴瞻列宿稀新涼  
生禁樹餘曝入宮衣天巧宜頻乞惟於宦路非

新泰車中

曉雲不及客裝輕薄笨相攜大坂行平楚綠沿荒戍隱野  
桃紅倚午村明經春古澗初通水近嶽他山盡有名好手  
荆關圖不足總教收捲入吟情

直廬一首有寄

直廬特許北門開視草新恩擢上才初地傳衣將百歲昔  
賢倚筆已三迴興元赦制加顏讀澤潞軍書運掌裁潤色  
王言良不易豈惟前路近中台

贈王香海同年

城

六銜官鼓應雞鳴緩步清郎試履聲不及昌平陳主事相  
公爲賦賣車行

香海賣車徒步前陳伯思曹長亦有是事英相公夢堂爲賦賣車行詩

李鼎元字味堂亦字和叔號墨莊蘇州人乾隆戊戌進

士改庶吉士官兵部主事有師竹齋集

詩話和叔與兄雨村弟鳧塘先後入翰林皆負文望世稱蘇州三李和叔詩無所不仿而於杜蘇爲近嘗奉封册至琉球紀其山川人物蹊徑一變壯麗恢詭尤擅勝場云

晚興

月破竹梢煙階除疊玉錢蟲聲依戶冷  
燈火向人煎心靜  
書多味霜清菊正妍  
忽聞賓雁過秋士感華年

和石亭伯父山房卽事

梨花如雪柳如絲  
正是蜂狂蝶亂時  
席上每留將盡酒  
階前常剩著殘棋

秦中

歷盡奇山到雍州  
鳳凰聲出杜鵑收  
中原霸業歸前漢  
古王風屬武周  
天險難依星北拱  
地靈有恨水東流  
潼關

四扇堂堂在爲說興亡欲白頭

韓文公墓

五百年來說盛唐韓公有墓近祠堂一書險葬潮魚腹萬古長埋佛骨香道許孔林爲弟子文教李壁得歐陽求師特向孤墳拜松柏森疏帶草荒

越州雜詩

地僻幽情愜江樓俯翠微海雲連水立山雨帶花飛嫩筍春林美鱒魚夏日肥樂遊乘醉飽夜夜月中歸

順風行

舟疾如箭破大波舟子拍手歌吳歌輕帆兩道挂天碧一生弄船無蹉跎須臾風迴怨聲起卻羨傍人歌聲美順風莫喜逆莫愁風雲變態無時休

佛鐙歌

鐘鼓寂寂銀河殘佛鐙將現僧呼觀大被纏腰出殿後罡  
風刺骨重裘單或高在山低在麓或遠在江近在谷萬人  
列炬上山來陰火燐燐斷還續疑是元宵錦城燭又疑星  
隕如珠聯濯以甘露光逾鮮太乙杖藜朝普賢化身散作  
千金蓮燭龍銜耀照重泉見大光明有如此真耶幻耶誰  
所使蠻君鬼伯爭前驅應笑生人凍欲死

荆南懷古

猿聲聽盡客如何漫續離騷弔汨羅至喜亭遙山瘴少莫  
愁村近竹枝多由來冠蓋堪名里信有銅鞮學唱歌日暮  
漢皋驚歲晚美人何處隔風波

同人集有正味齋醉後分韻得明字

坐客七人在虛窗殘雪明霜花貪燭影風竹妒吟聲讀書  
詩神躍呼茶僕夢驚文章有天趣星斗正縱橫

鳧塘病久而信庸醫慮其傷元氣也詩以勸之

驅病如驅賊選醫似選將豈不事攻伐元氣未可喪當其  
初病時身弱神尙王生軍搜根株雖苦用猶當姑恤既養  
姦陰邪日以壯脈浮出三關形枯累五臟妙藥茲奏功寬  
猛兩無仗何以知良醫法必濟名相先求寸心安漸令四  
肢暢生死而肉骨庸手焉敢望投鼠須忌器此義古難忘  
最憐沈痾人欲速性徧亢小利滋大害如以殺止謗便恐  
川壅潰萬夫莫能防性命爭毫釐那得不惆悵慎哉復慎  
哉時醫半孟浪

五月十有二日由霸港奉册入天使館



萬人爭看使星來一朵黃雲抱日開  
山到流蚪平似岸水歸霸港小於杯  
王孫守禮衣冠古草木承恩雨露催  
賓至如歸今始信果然聲教震無雷

再游奧山月夜泛舟由南麓越重島渡里村歸自卻

金亭

奧山不重游恐被山靈笑策步上峯頂  
遂得極高妙東窺首里城辨嶽出雲嶠  
西望姑米洋海氣鑿泉竅南北昨所  
歷形勢攬其要萬松回日光眾籟激  
風調激流狎郭舟踞石垂任釣晚汐  
不我欺明月早相照白魚射波飛  
紫燕掠船叫木石陰森沈星斗光  
震掉此間無酒肴何以助吟嘯  
一杯酌海若遺跡枉憑弔人家露  
燈火亭際集庭燎莫漫醉言歸來  
日事難料

中山雜詩

奧山及波上游覽最清奇  
石罅潮聲透松陰海氣移  
球官垂帶立夷女戴筐馳  
鬢鬢霜如此來觀亦太癡

古刹如亭小禪堂卽客堂  
僧衣能斷俗

球僧袈裟外別有一衣如背心狀名曰斷

俗 席地可無牀供佛惟花蕊烹茶半雪  
餠此邦殊服食何以慰愁腸

幸有奇花木能將遠客招  
佛桑然似火鐵樹挺於蕉  
野徑多叢竹人家隔小橋  
晝長無箇事步履溷漁樵

海氣入樓腥停雲肯暫停  
簷高惟聚雀草茂只多螢  
書帙因風亂詩腸對酒醒  
那堪愁夜永雷雨撼窗櫺

馮敏昌字伯求號魚山欽州人乾隆戊戌進士改庶吉士授編修改刑部主事有小羅浮草堂詩鈔

詩話魚山弱冠時受知於翁覃溪覃溪既歿語及軀  
歛歎初以詩謁錢捧石評謂嶺南自曲江後諸子皆  
存偏方之音惟馮生力追正始黃香山謂曲江極其  
醇至魚山極其大皆當以一代論者魚山詩曲昌黎  
山谷上追李杜貫穿諸家自成蹊徑嘗遍游五嶽周  
歷邊塞廣搜金石故其詩瑰奇怪特盤鬱萃律踴然  
為嶺南大宗

天馬山

羣峯離合海雲同天馬獨起如雲龍鼓鬣西行十餘里遠  
攬積秀凌虛空雲滾雨洩千萬丈雖有變化無終窮極知  
造化鼓鑄力不數分寸人間功大石騎危已齧齧萬木枕  
股何濛濛連嶂崩騰首尻見陽崖豁敞明心胸晨朝景氣  
一澄霽交人以南欽以東五嶺南來入於海當復賴此司  
其雄惜哉謝公屐折齒幾欲馬匹羞同蒙繫余生長好游  
覽每望河渭思華嵩山川悠遠意蕭瑟歸來擁蔽蓬蒿中

豈謂山林落吾手久已斧鑿煩神工窮幽探祕餘恂悅欲  
語絕景誠何從猿猱呻吟鬼悲嘯松下但有斜陽紅因欲  
脫屣騎鯨魚飄然巨海浮天風

篠溪

小園之傍北一里一水潺湲弄清泚沙圍石小苔髮明影  
亂風篁聲亦似海中自鼓成連琴拏舟相從勞我心但使  
紆流菜畦裏亦能息機同漠陰

銅魚山

銅魚山高一百尺山頭井深不盈尺銅魚飛去影冥冥空  
有長熊作人立榛草荒寒澗風露松桂蕭條戀崖石巖虛  
壁歷遺刻暗磴絕梯懸古苔澁淒冷氣象幾百年姜子書  
堂竟誰識位重平章何足道名侶金鑑聞在昔朝廷暇豫

直諫聲時事倉皇叩馬力奇才本自在山林編摩未審何  
書策平生負氣本落落邇來望古還惻惻銅柱迢遙邊嶠  
峙翼軫蒼茫煙霧積誰憐海角空蜃氣徒爾山靈護礎石  
陰雨濛濛遠江合晴雲溶溶半山出林巒清曠無古今公  
應未減眞顏色

靈泉

山勢小卻車轉轍山日下燒傾火盆山行得水一下馬十  
步之內卽水源一泓清冷長感沸漫說窺臨沁肌骨迴流  
湯沸雲氣蒸卻值寒威萬里凝嚴冬濡足殊可念語以夏  
涼或不辨我來擢手揚清波波間石色多丹砂丹砂故井  
復何有願結芳宇陽之阿

海螺峯

流雲四垂雨微冥海氣長吹春霧腥千間矗矗樓閣形浮  
天修眉一痕青誰從媚妙誇娉婷樓閣之人夢初醒礪松  
巖松暮芳馨何當採芝歌洞靈

鐵冠巖

我浮凌江問韶石孤舟百丈緣江干江干巖石勢往復盡  
日紫翠篷窗攢幽處時時舍輕楫捷足往往追飛翰危崖  
忽豁得真賞嵌竇架屋驚奇觀玲瓏窵窵窗戶揭宛轉形  
勢堂廡寬白蝠鴉騰乳獸立蒼蘇甲脫藤蛇蟠深坳似聞  
虎腥熱積黝下宅龍身安火鈴流照氣先攝金鏡在掌神  
爲寒當時坐覺萬象迫過眼豈特飛煙殘豈知鐵冠丈人  
在許我舊好聯新懽我來未能同酒客桑苧書攜二三策  
已欣松枝落細細更聞石井鳴瑟瑟是時山意初風色徐

看細雨來清壁鐵浪茶芽春早摘破顏一笑非水脈詎驚  
聲轉羊腸間最喜涼生塵尾側平生嗜險探奇意到此蕭  
然反冰釋窮荒物色感靈異萬里煙霞思羽翮還應野服  
攜黃冠晚向蒼屏吹鐵篴

瀑泉

石梁上橫五雲片澄潭下懸一匹練潭中靈物長有靈夜  
擘林石捎雷電天容黯黯晝不改風氣蕭蕭時一變千林  
雲落鳥聲絕百斛珠圓映人面吾家書堂深竹中亦有峯  
巒垂几研詎知遠目新雨後天半虹霓掌中見觀山未必  
觀水樂卧游豈比行游倦已看窗戶延虛照便擬茶瓜啟  
清宴誰能杖策俯潭深靜聽鼉翻九龍戰

夜感呈勺海

淒淒鐙影下愁坐意何如病久難爲客身閒易著書星光  
來枕細蟲語入秋疏處處西風急誰應念索居

雲杜館

殘月上空堦有如微雪光復有木已枯卧形於其旁幽人  
夢不省歸去求松篁途迷安所之開門以彷徨大星西徐  
行念此何無常斗杓亦何爲尙指東南方

交窮覽異方忘此爲楚越危動眾不應隱忍余不發余聞  
古賢達先世常遜佚觀其所蘊異保焉則終吉邨上田一  
壩昔者楊季室子雲龍蛇志昌辭早慕屈吾觀反騷作意  
勝草元日亦復勝獻賦長楊羽獵筆投閣固哂眾執戟已  
嗤黜何如岷山陽終念守沈鬱

唐元宗脊令頌墨蹟卷



塵煙蔽天元武門，唐家四海無弟昆。詩人歎息何爲者，急難鶴鶴思在原。逡巡三郎作天子，媿美貞觀稱開元。名垂金鑑播彤史，樓成花萼輝乾坤。花萼樓頭風日美，麟德殿前花鳥繁。花奴擊鼓雪兒舞，琵琶朔管聲喧喧。五王貴盛聞天下，濟濟羣臣無間言。神龍已報戲潛底，雍渠忽見當庭軒。飛鳴行搖信得意，飲食行宴堪同論。誰與獻頌魏長史，手足愉悅情相宣。神藻飛時煥祥瑞，天筆落處光瑜璠。趙明誠謂天寶間刻石和氣感召詎不信，讓帝終始尤克敦。誰令阿環玉笛竊遽使，步幃金雞蹲。延秋唳烏最先起，蜀道杜宇聲重吞。長安繁華但一夢，幾人跋馬追西奔。惟餘寶墨照春色，異時歌板停芳樽。歐趙題識罕辨證，汝帖補綴空痕。遙遙千載發長喟，尺布斗粟空仁恩。天寒展卷數開闔。

門外急雪看飛翻

蕭尺木楚辭歌圖

詩人無媒安問天畫手欲並前人肩誰云畫史胸次狹有  
此人物神鬼仙瀟湘洞庭渺風煙蒼梧北渚雲連綿屈子  
神游向何處飄蕩恍惚凌風船天閭不開吁可憐鸞鳳蛟  
龍相後先湘君夫人環珮捐雲之君兮下翩翩幽叢山鬼  
媚余笑坐使狸豹工攀牽猿狖悲哀草木泣靄雨昏絕楓  
篁顛嗚呼重華不可作湯禹祇敬憂其誓王佐霸功幾遭  
遇孤臣孽子多迍邐不聞讒鼎鑄饕餮共說饗雉私彭錢  
女媧鍊石補不盡缺限首在磨兜堅搔首問之不得對無  
聲第寫愁詩篇古來作者俱精專妙手須附詞人傳略如  
蟬嫣有苗裔鬼才貯錦仙青蓮我昔長江浩洞沿太白樓

高磯勢偏匡廬峨眉接雲氣雲臺日觀森鉤纏誰呵四壁  
吐墨瀋不食七日愁管鞭畫成長嗟果絕筆事過感激難  
爲緣再游京國今幾年蕭齋寄寂來騷箋讀罷想像得真  
契使我坐歎心茫然昔畫何減吳道元今圖何謝李龍眠  
誰能御氣出天地披髮往逐煩憂蠲

河津觀龍門歌

驚濤殷地聲如雷瀕河路折聽喧歷連天煙霧不知數西  
望一氣連峯開峯如連牛亦奇哉豈謂河自峰腰來騎危  
路轉峯還回地窮轉石蹶斯下天成巨閘高何嵬仰看鐵  
壁形如隕俯積雲氣容如灰想像崑崙崙崙萬里導源至此偪  
拶不得出豐隆列缺乃驅應龍畫地鼓翼掉尾揚其頰尾  
開噉豁奚遲迴山口一石門還闕誰令千丈勢忽斷真見

當時指麾萬眾雷輓電激轟鉗鎚河流怒噴風迴埃建飯  
一瀉無垠垓長瀾千里更東下高掌萬仞從西摧吁嗟神  
功安可能雲雷合賴經綸才試觀千秋萬古山童水不竭  
於中禹蹟令人慨想心徘徊山前古廟臨危臺降神拜奠  
傾雲疊雲松繞屋鳴作鱗龍蛇滿壁昏成煤一從灑澹諸  
沈災何意逝水還相催淇園竹竿下不盡宣房瓠子空悲  
哀我願元氣深滋培權衡迭運兼公台濟川舟喜盛世見  
清河頌許詩人裁

大同寫望

雲中日氣乍如灰劍倚天邊尚有臺紫塞秋風隨馬度白  
登寒色壓城開禁中頗牧當時用宮後娥眉萬里來飛將  
有孫殊可念白頭還作望鄉哀

祝融峯頂觀雲海歌

我昔太華騎茅龍高登明星玉女峯  
飈車雷轟五千仞下視雲海開重重  
後游嵩嶽并恆岱閒值零雨迷春冬  
周流四荒眇何極復此南服羣山宗  
夏首來登曉觀日略比日觀稱奇逢  
豈知祝融最高處更苦雲雨千重封  
嶽靈飛精鑄元氣雲海一變舒晴容  
太陽開時金在鎔長風鼓處雲相衝  
嶽南嶽北兩噓吸樹頭樹底遙彌縫  
南海先成雲漾濃兜羅錦網堆鬢鬆  
湘流五轉忽盡失但覩壑皺來溶溶  
倏如魚鱗疊不盡界以墨色豪迴峯  
渺然隨風似遠適更漾北海知何從  
淨掃長天祗碧落平鋪匹練如吳淞  
洞庭波濤遠莫接側耳近若聞洵洵  
自北而南忽倒漾大雲海合琉璃鍾  
圓鏡千尋徹上下瓊田萬里鋪縱橫  
祝融峯高

聳螺髻青石壇古蟠蚪松松從壇側亦倒挂放我石上支  
孤筇風意捎雲雲態慵一尖遠視青芙蓉忽然橫峯小露  
春如魚戲水方險喁飛來石船在何許悅欲飛去還無蹤  
蒼茫變現詎可極真令盪我平生胸奇觀人生諒有數幽  
賞物外知誰供倒嘗佳境似得蔗近想堂密非無樅素履  
幽貞聊坦坦朋從思慮奚憧憧少文名山願頗遂向禽空  
谷音還跼桑田滄海任幻相仁山智水留歡悰昔游低徊  
自惺忪雲嵐變滅餘蒙籠上封歸來日未暮一聲已動天  
門鐘

登岫嘍峯作

衡峯首迴雁臨江初不高岫嘍特騫鵬峩峩插雲濤茲嶽  
信神奇茲峯益雄鷲崔巍切雲冠奮迅騰溟黿還疑金銅

仙摩天出蟠桃其下干青蓮附萼相周遭栝柏斧不盡雲  
雷數來鑿未論祝融尊且放茲峯豪繁昔懷襄時洪波莽  
天滔神禹傷父功血馬登山號日照繡衣夢霞開金簡韜  
地絡已得要天柴茲告勞奇文祕龍鸞光氣驚猿猱昌黎  
昔窮搜先笑後號咷歷本誰竊摹千鈞延一毫茲來歎冥  
茫祇擬懽游遨凌峯采石藥觸興歌詩騷絕頂還一登入  
極直翔翔松風吹我行天籟紛嘈嘈既已辭樊籠何用餽  
餽糟

陳詩字愚谷號觀民蘄州人乾隆戊戌進士官工部主  
事有大桴山人偶存集

送饒三試吏江西兼寄彭秋潭

長楊溪水流涓涓千曲百折奔長川東匯清江復東注彭

蠡大澤吞江天江天茫茫幾千里十載高歌寄燕市未奉  
長安一囊粟且吸江西一口水章貢交流春水長雙姑昨  
已嫁彭郎停船爲問江州客聽罷琵琶淚幾行

送羅肯堂同年歸九江

沔口經年住潯陽一望通薄田無樂歲瘦骨易秋風有客  
如張祿何人似孔融片帆歸去好蕭瑟對江楓

周嘉猷字順斯號慕蔭海甯人乾隆己亥舉人官兵部  
主事贈員外郎銜有雲卧山房詩集

詩話慕蔭才華典贍下筆輒千餘言乾隆丙申應天  
津召試取二等第七甲寅再應天津召試取二等第  
二文名藉甚疆吏督師爭聘佐其幕後以積勞致疾  
卒贈銜賜金歸葬廕及後嗣飾終之典論者榮之詩  
緣情綺靡雅近飛卿

長生殿



天上人間思渺茫  
驪山星月映霓裳  
千秋未了來生願  
百劫難消此夜香  
銀漢迢迢憐對影  
金釵密密誓迴腸  
樓東亦有承恩處  
可記珍珠一斛量

百子池

漢苑恩深同輦時  
宜男靈瑞祝芳池  
蓮拋紅粉垂多子  
玉映藍田種有期  
百尺樓臺秋遠近  
九光鐙火夜迷離  
于闐仙樂誰聞得  
佳話流傳到侍兒

長闡字邁仁漢軍旗人乾隆己亥舉人歷官護軍統領  
有挹綠軒詩藁

題丁琢亭畫令公廟壁

山色透池樹色稠  
風光遙接塞垣秋  
僧棲紅葉林邊寺  
人在斜陽江上舟

過龍王廟憶永聞上人

緇衣曾染墨痕香  
茗椀鑪煙繞石牀  
自昔談元聆象教  
於今問法向龍王  
曇花黯淡飄蘭若  
薜蔔參差護影堂  
坐對僧雛思老衲  
愴然霜鬢獨迴翔

訪浩然上人不遇

策杖叩禪扉  
穿雲入翠微  
虛堂人跡靜  
深院俗塵稀  
談塵驚花落  
風鈴怖鴿飛  
徘徊雙樹下  
但見暮鴉歸

獨宦

獨宦秋色晚  
西風落葉飛  
旅人猶未返  
社燕已先歸  
草木新霜冷  
關河舊夢違  
壯懷空復爾  
鷗鳥近忘機

沈長春字小如歸安人  
乾隆己亥舉人  
歷官湖南按察使  
有古香樓詩集

留別史靜軒

別語無多別思催，祇今蠟炬半成灰。  
劉蕡會上干言策，龐統應非百里才。  
鶴徑掃開殘月路，馬蹏蹋碎亂雲堆。  
此行莫道增惆悵，分得清風兩袖來。

留別賈聽桐

聞道清霜五月寒，冷雲漠漠恨漫漫。  
好將怨李恩牛事，都作藏蕉覆鹿看。  
青眼難忘交誼篤，白衣終荷聖恩寬。  
傷心同調應相憶，長笛聲中夜未闌。

舟行偶成

無邊行旅跡，向晚又煙濤。  
秋色滿天地，勞人空古今。  
亂颿風影碎，衰草岸容深。  
會得虛舟意，徒煩倚櫂吟。

周鎬字懷西，號犢山，無錫人。  
乾隆己亥舉人，歷官漳州。

知府署汀漳龍道有嶺山詩彙

詩話嶺山初令景甯歷平陽餘姚常山鄞諸邑所至  
有惠政遷乍浦同知擢守衢州修孔子廟於敗壁中  
得康熙間樂清教諭方鑑題記曰百四十年杜召重  
修鑑故通推算自康熙初李文襄建廟至是年數躋  
合旋移漳州地號繁劇布政優優素工詩  
古文辭制舉文沈博絕麗尤膾炙人口  
儀徵夜泊聞琵琶

急雨嘈嘈下海門隔船愁聽爲停樽江邊司馬秋風淚塞  
上明妃夜月魂猿鳥無聲山寂寂魚龍欲舞水昏昏天涯  
自古多淪落幾輩相逢得細論

何夢蓮字淨亭號周溪正定人乾隆己亥舉人歷官榆

林知府有式古堂詩集

詩話淨亭以拔貢官刑曹嘉慶初征苗出從軍改戶  
曹擢諫議出守榆林林清變起追咎畿輔朝官在言  
路者不先發淨亭亦坐是左遷詩近  
元白軍中諸作有蒼涼沈鬱之勝

過武陵

江水平於掌張帆借好風天隨兩岸闊舟出萬山中遠浦  
浮鷗白疏林落照紅漁莊如可住不復事青驄

舟泊金陵

金陵城外晚蕭蕭伊軋舟行過斷橋兩岸柁聲敲夜月一  
江帆影弄秋湖山川形勢通三楚裙屐風流憶六朝虎踞  
龍蟠名勝地放懷我欲訪漁樵

紀大奎字慎齋臨川人乾隆己亥舉人官什邡知縣署  
合州知州有雙桂堂稟

詩話慎齋達於易學所著有觀易外編及易  
問等書詩喜學康節擊壤吟往往墜入理障

關帝廟觀壁間畫

天地本好生治亂何終始殺機當既鍾佳兵者咸是悲哉

塗地功沾沾羣自喜如公豈其人夫誠不得已畫圖滿壁  
閒誅戮何纍纍無乃神意傷嗟然不忍視吁嗟俎豆徒所  
誇抑未耳天地曷以充頑懦曷以起是中非偶然在此不  
在彼

廣信至玉山舟中

水如樹欲靜灘如風不甯百里斷腸聲當年游子聽一往  
不可復此行安所欲千古流水心耿耿在幽獨  
東南是滄海此水乃西行高下數百里時爲不平聲所遇  
有如此流恨何時已可憐無父人猶作浪游子

余蒞什七載王申秋保薦赴都邑人士多賦詩見贈  
作此答之并示父老

子羔學未成質美猶難恃漆雕斯未信欲然謝子使矧茲

襪綫藝製錦無乃毀七載殊兢兢浩如涉淵水感諸澹臺  
賢非公不至止瑤華忽贈音惜別窮治理藐矣予何言大  
哉禮乎禮聖訓萬古存民行端賴此願農力耕桑親睦無  
我爾願士法詩書敦行表鄉里仁讓既已興風俗日淳美  
弟弟與兄兄父父而子子無懷之民與如斯而已矣民和  
歲自稔有司亦良喜作詩酬衆心身遠神猶邇攬轡行復  
來此願勵終始

趙希璜字渭川廣東長甯人乾隆己亥舉人官安陽知  
縣有四百三十二峯草堂詩鈔

詩話渭川詩草甚富同時黃仲則張船山馮漁山洪  
北江吳穀人張蔣房皆稱道之嘗登玉屋山繪爲雲  
車飛步圖  
以徵題詠

松風亭

小亭起得傍東城，城撼松吹夜半笙。  
風景于今傳北宋，寒瀉竟日咽唐庚。  
落花黃滿無人掃，瘦葉青垂有鶴行。  
忽化蚪龍鬪雌霓，爪牙碧血看交橫。

寂寂山光月有聲，都於松下響蔥珩。  
一池水浸琉璃碧，半畝陰同翡翠輕。  
不放梅魂斜竹外，卻留龍骨藉雲生。  
何人酒醒夢初覺，追憶淮南淚泗橫。

漂母祠

千金報漂母，百錢報南昌。  
等爲酬一飯，恩怨難相忘。  
功成名亦立，悲哉未央執。  
爲德何不卒，天下當已集。

棲賢三峽橋

玉淵下注三峽開，清猿唳斷悲風來。  
鱗鱗蕭蕭千乘車，橫枝直幹萬朵梅。  
長公之詩清入骨，推倒峨眉月窟堅。  
瘦



長輸紫翠間面目新看雲霧撥龜鼉魚鯨蛟螭叫或偃或  
仰或垂頭忽然吞食怪事發水石激射疑不流東虹西虹  
美人愁銀河織女歸牽牛烏鵲逃入棲賢谷少兒曉上梳  
妝樓甚深法力過奔溜飛橋誰補青天漏靈籟猶聞出地  
賁喧逐競逐迴風驟

楚王廟碑

氣蓋世力拔山叱咤風雲變色間狼如羊猛如虎逐鹿中  
原三戶楚淋淋手提上將頭宋義不死亡秦讐重瞳九戰  
絕甬道百萬空壁觀諸侯萋萋宮殿咸陽火置俎杯羹幸  
分我鴻溝已畫歸彭城跳梁畢竟成么麼時不利雖不逝  
烏江自刎虞兮淚漢歌四面楚人多漢室惟知尊義帝頽  
垣敗壁搖秋風何曾陌上遺民逢奏毀淫祠我輩事豐碑

胎誚檄梁公

李大成字裁之新會人乾隆己亥舉人官長武知縣有荷莊檢存彙

半塘晚步

幾縷炊煙散晚晴平橋水遠漾空明秋郊十里尋詩路人在西風落葉行

渺渺郊原縱目長青山依舊鬱蒼蒼三城宮苑知多少半是人家半夕陽

追虎行爲廖福友作

龍虎灘頭四山高黃茅滿山風蕭騷同舟色變聽談虎長年誇說而翁豪翁船昔年曾泊此官差捉船船潛逃飛鵝嶺下最深處澗深路僻纔容舸是時更深山月黑松林風

起山氣逼有虎咆哮飛上船作勢撲人人僵踣翁忽奮起  
健拳掀虎已銜人向崖奔騰身躍登握虎尾大聲怒號如  
驅豚雙手淋漓人血赤虎口奪人人辟易裹傷扶抱向船  
回澗水潺潺虎潛蹟此事聞來我亦疑翁材不及中人姿  
義憤一激肝膽烈生死問翁翁不知毋乃氣能懾猛獸赴  
義鬼神亦助之座中聽罷神欲旺石壁獵獵陰風吹

何文明字哲堂香山人乾隆己亥舉人官涪川知縣有

二思齋詩鈔

雨後小園散步

殘滴收檐牙號號雷猶怒炊煙遮山起倦翮遺響度亂雲  
飄破絮薄者乃若霧蛩螻噍嚙纖柯蟠竦橫薄暮葉色翠於  
染蛩語繁如訴林罅逗微涼清氣彌衣屨觸處皆成賞獨

立如有悟何人抒幽懷吟聲出深樹

彭蠡遇風

黃氣慘慘風勢惡雲如壞山勢將落江狹水面作人立紛  
飛鷺鷥與鸛鶴巨艦真如夾兩龍飛翔之勢欲凌空顧盼  
兩岸目爲眩銀濤雪浪相撞舂我時憑舷事小酌破浪乘  
風真足樂坐客惕息指我癡公等不癡欲何作

泊饒州

片席入空明危檣薄暮停城環三面水湖浸一天星葭葦  
搖煙碧魚龍吹浪腥一身息泛泛沾酒醉還醒

黃錯字文石瀘溪人乾隆己亥舉人官武功知縣有四

雖吟草

舟次早起

晨光吐熹微溪上露華泣林鳥掠舟鳴餘星帶雲捲晨興  
寂無人殘夢猶可緬羣動機未萌天倪尙鈐鍵勿慮何所  
圖無翳不待翦山水靜悠悠理會是非遣

暮夜再游晉祠同趙浣瀛秀才

靈湫一泓澄灌溉足百里活活走瓏玲泠泠淨泥滓所被

一何遙其源爲可恃豈真靈風旂夢雨興漫瀾上有龍母祠禱雨輒

應魚鳥本親人生機託清泚君看藻苻鳧並作跫然喜

張懷泗字環甫漢州人乾隆己亥舉人官宛平知縣有

榴榆山館詩鈔

詩話環甫嘗令順義法梧門過之適公事出留贈云  
秋曠孤鴻舉林荒匹馬經沙連村月白山帶縣門青  
金劍鏡前倚玉琴泉外聽有時竹枝和古峽記空船  
原注君工詩故以漁洋語似之環甫和有高人一浮  
白山色有餘青句酬戴醒夫云丰骨尙存人未老旂  
檀欲盡火重溫和陳卯生云著述一家經百鍊圓通

十道悟三生先盧云巢燕歸來香寂寂屋烏飛去影  
遲遲豈無廣廈千間意漸覺霜華兩鬢絲皆文外有  
致

讀楊蓉裳先生芙蓉山館詩用集中李墨莊詩韻

達不悔出山窮不悔識字詛祝且由人饑飽行吾志古今  
數君子天與好才智馭氣如馭龍按節如按驥偶然脫羈  
勒亦自有遐致生平結古歡不灑素絲淚

踏徧好山水奇光愜清節飽飫煙霞氣溶溶一腔雪摩挲  
三尺劍尚帶焉耆血迴首誓師時浩歌聲激烈迸入五色  
賜翻覺八叉拙邇來染翰餘泊然味禪悅

九籐杖

滄江龍子卓水立飛上青天爪甲溼壺公伸手攫龍迴雲  
歸雨歇千山碧昔日爲竹騎長房今日爲籐扶顛張是杖

是龍那可測精光炯炯干夫強歸來行腳半天下倦卧匡  
牀保嬰姪有客肩簾款華門健僕依依隨長者青城大峩  
花冥冥五岳四鎮蒼然青便欲登峯觀日出徑跨長虯橫  
海溟游山有福未易得到處且尋詩酒客黃髮友人今在  
無綽約仙娥方食息與君邂逅亦前緣慎勿奔騰思舍旃  
杖鄉杖國知何似試量佛頂誰媠妍

開元寺晚眺

夕陽沈古寺清淨悟前因鐘版迦難意香鑪慶厯春僧官  
不讓客野馬常驕人興替成何事冰蟾又涌輪

陳紫林以所畫一魚一劉海戲蟾寄贈兼索書恩恩

作此答

松江曾記四腮鱸萬里歸來老釣徒三十六陂煙水闊藤

箋一幅墨痕孤

我亦江湖浪宕身每從斗酒悟前因與君共作蛟龍吼可  
是煙波透網鱗

忽把金錢幻老蟾畫圖遊戲更踟躕幾回欲逐劉仙去長  
看瑤臺皓月圓

孝子閔貞高相國本朝大寫最知名紫林楚產三巴客元  
氣淋漓萬古情

雨後由西郊至龍居寺

梅雨連宵立夏前鱗鱗細縠漾春田秧鉞刺水青如沐好  
是新晴卓午天

島嶼滌洞憶昔時分明湖水又漣漪人家多傍綠楊住一

路春旗接酒旗

西郊湖田數十畝  
舊云是房湖故址



輓輿搖兀似輕航頗怪橙林礙日光轉過橋頭迤南去綠雲如水蘸平岡

魚婢蹙波常近市鶴仙斂翼靜聽經隔江隱隱招提出四面松篁作畫屏

胡翹霜字晴嵐號楓園麻城人乾隆己亥舉人官興國學正有香雪亭詩集

羅溝雨中秋望

細雨雜疏煙江鄉九月天黑雲低楚岸紅葉上吳船水落魚蝦窟村排雁鷺邊荷蓑人自得生計在前川

岳陽晚眺

獨倚江樓思渺茫  
鱗棚魚舍暮蒼蒼  
黏天草色橫孤鷺  
繞郭潮聲下夕陽  
萬里風帆通蜀漢  
三秋雪浪照衡湘  
騷人

莫便悲搖落尙染巴陵橘柚香

王心清字澄源臨淄人乾隆己亥舉人有有竹堂詩集

登登州城樓

海勢環三面人煙聚兩城灘頭魚網集天際客舟輕春色  
登樓見鄉心逐物生西南一回首落日數峯明

晚晴籜詩匯卷一百一終